

# Bantuan lanjutan mampu ringankan beban

Sinar Harian - 24/12/2021 m/s: 6

Ismail Sabri akui Keluarga Malaysia hadapi kesengsaraan akibat bencana banjir

Oleh MUKHRIZ MAT HUSIN

## SHAH ALAM

**K**erajaan mengumumkan bantuan lanjutan daripada inisiatif terdahulu termasuk Bantuan Wang Ihsan (BWI) berjumlah RM1,000 untuk setiap ketua isi rumah, bagi membantu meringankan beban Keluarga Malaysia yang terkesan akibat banjir.

Perdana Menteri, Datuk Seri Ismail Sabri Yaakob berkata, bantuan berkenaan


diberikan setelah mengambil kira kepayahan dan kesengsaraan terpaksa ditanggung Keluarga Malaysia akibat terkesan dengan bencana banjir baru-baru ini.

Beliau berkata, agensi kerajaan dan sektor perbankan akan melaksanakan beberapa inisiatif bagi meringankan beban rakyat dan perniagaan terutamanya Perusahaan Mikro, Kecil dan Sederhana (PMKS) yang terkesan akibat bencana banjir.

“Ya bantuan bayaran balik pinjaman untuk mangsa banjir bagi pinjaman perumahan dan hartanah, kenderaan, kad kredit serta pinjaman peribadi sehingga enam bulan.

“Antara kemudahannya termasuk penanguhan atau pengurangan bayaran balik ansuran,” katanya dalam kenyataan pada Rabu.

Ismail Sabri berkata, an-



ISMAIL SABRI

tara bantuan lain adalah pembiayaan kewangan peribadi tanpa faedah sehingga RM5,000 oleh Bank Simpanan Nasional (BSN).

“RM100 juta diperuntukkan bagi tujuan ini untuk meringankan beban mangsa banjir membeli peralatan dan kelengkapan rumah yang musnah akibat bencana.

“Moratorium enam bu-

lan pertama ke atas pembayaran ansuran bulanan dan terbuka kepada mangsa banjir seluruh negara,” ujarnya.

Perdana Menteri berkata, Tabung Ekonomi Kumpulan Usaha Niaga (Tekun) Nasional turut mengkhususkan dana berjumlah RM30 juta untuk Pinjaman Pemulihan Banjir Pembiayaan bagi PKS mikro yang terkesan.

Katanya, bagi pinjaman sehingga RM10,000, tiada kadar faedah dikenakan dan moratorium bayaran balik diberikan untuk 12 bulan.

Tambahnya, Bank Negara Malaysia (BNM) juga mengumumkan kemudahan pembiayaan sebanyak RM200 juta yang disediakan untuk PMKS yang terjejas melalui Kemudahan Bantuan Bencana 2022 (*Disaster Relief Facility, DRF 2022*).